


TEZĂUR LITURGIC
13 IANUARIE

ACATISTUL
SF. CUVIOS
ELEAZAR
DE LA ANZER



MOSCOVA, 2000



Акафист
святому преподобному
Елеазару, Анзерскому
чудотворцу

Кондак 1

Избранный угодниче Божий, светлостию жития твоего и чудес благодатию просиявый в пустыни севернаго Помория, преподобне отче наш Елеазаре! Хвалебныя песни приносим ти, подвиги твоя воспевающе. Ты же, яко благоприятный молитвенник ко Господу, от всяких нас бед свободдай, да зовем ти:

Радуйся, преподобне отче наш Елеазаре.

Икос 1

Ангел житием и путеводитель многим ко спасению был еси, преподобне отче Елеазаре. Темже и мы ныне к твоему предстательству прибегающе, приносим ти хваления сицевая:

Радуйся, единого Господа измлада
возлюбивый;

радуйся, чистоту душевную от юности
сохранивый.

Радуйся, равноангельно поживый на земли;
радуйся, яко со ангелы ликуеши на небеси.

Радуйся, на демоны мужественно
ополчивыйся;

радуйся, небесных видений сподобивыйся.

Радуйся, смирение сердца до конца
сохранивый;

радуйся, безмолвное житие тепле
возлюбивый.

Радуйся, преподобне отче наш Елеазаре.

Кондак 2

Видевше благочестивии родители твои
усердие твое ко иноческому житию, на сей
спасительный путь тя благословити не
отрекошася. Ты же, преподобне, из дому
отеческаго абие изшед, во обитель Соловецкую
устремился еси, еяже достиже, радостно воспел
еси Богу: Аллилуия.

Икос 2

Разум богопросвещенный стяжав, мирскаго пристрастия избега еси, пречудне Елеазаре, и подвиги плоть умертвив, образ добраго жития иноком преподадал еси. Сего ради восхваляем тя сице:

Радуйся, отечество и род твой оставивый;
радуйся, богатство и славу возненавидевый.

Радуйся, суровое житие возлюбивый;
радуйся, Христу последовати возжелавый.

Радуйся, яко пристанища тихаго достигл еси;
радуйся, яко спасению многих послужил еси.

Радуйся, грядущая прозираяй;
радуйся, далече сущая провидяй.

Радуйся, преподобне отче наш Елеазаре.

Кондак 3

Сила Божия укрепляше тя на подвиги, блаженне Елеазаре, егда из обители преподобных Зосимы и Савватия изшед, в пустыню Анзерскаго острова вселился еси, идеже в безмолвии воспевал еси Богу: Аллилуия.

Икос 3

Имея молитву и крестное знамение яко щит
непобедимый, досточудне Елеазаре,
мужественно прогоняя еси вражия ополчения,
страхованиа многообразными на тя воюющая.
Мы же яко воина Христова ублажаем тя сице:

Радуйся, темных духов прогонителю;

радуйся, злокозненных их сетей
разрушителю.

Радуйся, именем Иисусовым враги
невидимыя отражавый;

радуйся, мудрость духовную стяжавый.

Радуйся, на невидимую брань верою и
молитвою вооруживыйся;

радуйся, воин Христов непобедимъ явивыйся.

Радуйся, полунощныя страны светильниче;

радуйся, неусыпный о людех молитвенниче.

Радуйся, преподобне отче наш Елеазаре.

Кондак 4

Бурю искушений и бед враг рода
человеческаго воздвизая на тя,
доброподвижниче Елеазаре, аки от игумена

посланный льстивно тебе является. Ты же молитвою Господнею того обличил еси и в бегство обратил еси, воспевая Богу: Аллилуия.

Икос 4

Слышав христоробивый царь Михаил слух богоугодного твоего жития, преподобне Елеазаре, лице твое видети возжела: ты же, повелению цареву повинуюся, во стольный град притекл еси и о рождении первенца ему прорекл еси. Сего ради глаголем тебе сие:

Радуйся, дерзновение ко Господу стяжавый;
радуйся, пророческаго дара исполненный.

Радуйся, христоробиваго царя веру
умноживый;

радуйся, на хвалу Господню того
подвигнувый.

Радуйся, честью царевою не
превозносивыйся;

радуйся, о славе единого Бога
возвеселивыйся.

Радуйся, яко твоею молитвою неплодие
царицы прекратися;

радуйся, яко плод благословен земли
Российстей молитвою твоею даровася.

Радуйся, преподобне отче наш Елеазаре.

Кондак 5

Боготечная звезда иноком Соловецким
являешься, отче Елеазаре, к небесному
отчеству тех путеводящая, такожде и всех
притекающих к раце мощей твоих умилением и
верою просвещающая, вопиющих к Богу:
Аллилуия.

Икос 5

Видеша ученицы твои, преподобне Елеазаре,
царево к тебе благово-ление, и повеление его к
построению храма во обители твоей прием-ше,
радовахуся. Мы же, Господне на то
благословение уведевше и видения чудесная
тебе явленная воспоминающе, глаголем:

Радуйся, Христовы словесныя овцы ко
спасению подвизай;

радуйся, нерадивыя от сна греховнаго
возбуждай.

Радуйся, ученики твоя неленостно в житии
назидавай;

радуйся, и по преставлении писаньми твоими
тех сердца умиляй.

Радуйся, словеса и учения святоотеческая в
сердце твоём запечатлевый;

радуйся, теми души ко спасению наставляй.

Радуйся, верный подражатель богоносным
учителем бывый;

радуйся, искусный иноков наставник
явивыйся.

Радуйся, преподобне отче наш Елеазаре.

Кондак 6

Провидец и провозвестник будущих и далече
отстоящих яко близ сущих был еси, преподобне
Елеазаре: темже и преставление духовнаго друга
твоего за тридесять поприщ прозрел еси. Сего
ради Богу, дивно прославляющему святыя Своя,
поим: Аллилуия.

Икос 6

Возсияваше лице твое небесною радостию и
духовным веселием, ангелоподобне Елеазаре,
егда сподоблялся еси Божественных открове-
ний и видений. Сего ради сице тебе зовем:

Радуйся, глас Божественный многожды слышавый;

радуйся апостолу Павлу собеседник в видении бывый.

Радуйся, Христов лик присно во уме твоём предносивый;

радуйся, многострадальнаго о Христе жития благий образ явивый.

Радуйся, на демоны воинствующим присный споборник бывый;

радуйся, братию твою козни демонския прозирати научивый.

Радуйся, правья веры добрый учителю;

радуйся, сомнящихся вере мудрый наказателю.

Радуйся, преподобне отче наш Елеазаре.

Кондак 7

Хотяще злии человецы досаду тебе сотворити, и того ради глубокое море преплывше, дерзостно к келлии твоей с прещением приближишася; но Божественною силою во изступление ума впадше, окрест жилища твоего в недоумении блуждаху. Ты же, незлобив сый, молитвою тати

оныя от таковаго помрачения исцелил еси и научил еси пети Богу: Аллилуия.

Икос 7

Дивно от Царицы Небесныя на подвиги наставляемъ, преподобне отче, непоколебимъ во твоём изволении блазе пребыл еси, и небесную славу уллучити сподобился еси. Темже ублажающе тя, глаголем:

Радуйся, небесных видений достойный зритель бывый;

радуйся, сосуде, Божия благодати преисполненный.

Радуйся, путь спасения ясно познавый;

радуйся, житием твоим путь сей нам указавый.

Радуйся, безмолвия и молитвы учителю;

радуйся, заповедей Господних верный блюстителю.

Радуйся, ангелоподобный человекче;

радуйся, монашескаго жития наставниче.

Радуйся, преподобне отче наш Елеазаре.

Кондак 8

Странствие досточудно совершил еси, чудотворче Христов Елеазаре, егда море преплывал еси с братиею, ладью твою молитвою от крушения посреде плавающего леда избавил еси и спасл еси сущия в ней люди, воспевающия Богу песнь: Аллилуия.

Икос 8

Весь пламенем Божественныя любви объят был еси, преподобне Елеазаре, егда во острове пусте богомыслием непрестанным и плоти умерщвлением подвизался еси, душу убо молитвою питая, тело же веригами удручая. О сем хваляще тя, зовем таковая:

Радуйся, ветхаго человека в себе не пощадивый;

радуйся, силою креста в подвизех себе утвердивый.

Радуйся, пустынное лишение доблественне претерпевый;

радуйся, память смертную присно имевый.

Радуйся, власяницею и веригами плоть свою смиривый;

радуйся, все плотское мудрование духу покоривый.

Радуйся, богодухновенных книг писатель бывый;

радуйся, мудрость духовную возлюбивый.

Радуйся, преподобне отче наш Елеазаре.

Кондак 9

Вси жительствующие в богоспасаемой обители сей к раце честных мощей твоих сошедшеся днесь, приснопамятне Елеазаре, и памятию добродетелей твоих сердца умиляюще, приносим ти хвалебную песнь, ангельски поюще Богу: Аллилуия.

Икос 9

Витийственных словес плетение не довлеет восхвалити достойно чудотворения твоя, преподобне Елеазаре. Обаче любовью движими, восписуем ти сицевая:

Радуйся, вождю духовных воинов;

радуйся, беснуемых свободителю.

Радуйся, приемый от Господа власть на духи нечистыя;

радуйся, и по смерти твоей низлагаяй
вражия на нас ополчения.

Радуйся, яко мощей твоих духи злобы
устрашаются;

радуйся, яко предстательством твоим всякия
болезни исцеляются.

Радуйся, в пучине морстей плавающим
помощниче;

радуйся, обидимых защитниче.

Радуйся, преподобне отче наш Елеазаре.

Кондак 10

Спасения подвигом добре подвизался еси,
приснопамятне Елеазаре. Темже от Господа
венец нетления тебе сплетется, егда святую душу
твою предал еси в руце Вседержителя, воспевая
ангельскую песнь: Аллилуия.

Икос 10

Царю превечному в Небеснем Царствии
предстал еси, святе Елеазаре, отшед от
временныя жизни. Мы же, молитвенника тя
тепла пред Престолом Господним имуще, зовем
сице:

Радуйся, от трудов времен-ных к покою
вечному славно прешедый;

радуйся, и нас труды богоугодныя возлюбити
научаяй.

Радуйся, на земли Пресвятую Троицу присно
славити обыкнувый;

радуйся, Святей Троице ныне со ангелы
предстояй радостно.

Радуйся, дерзновение молитвенное ко
Господу стяжавый;

радуйся, дар чудотворения свыше
восприемый.

Радуйся, здравие болящим подаваяй;

радуйся, во всякой нужде и беде сущим скоро
помогаяй.

Радуйся, преподобне отче наш Елеазаре.

Кондак 11

Пения хвалебная угоднику Божию
приносяще, о празднолюбцы, всечестную память
его духовно торжествуим; подвиги же его и
чудесная деяния прославляюще, воспоим Богу
песнь: Аллилуия.

Икос 11

Светозарная звезда явился еси, отче Елеазаре, во мраце страстей нас сущих озаряющая и ко свету спасения приводящая всех вопиющих тебе таковая:

Радуйся, обитель твою и по смерти не оставляяй;

радуйся, живущия в ней невидимо назираяй.

Радуйся, пищею духовною нас удовляяй;

радуйся, на потребу телесную вся от Господа нам подаваяй.

Радуйся, в житии твоём молитве деннонощней братию научивый;

радуйся, и по преставлении твоём в молитве нас укрепляяй.

Радуйся, скорбящих тайный утешителю;

радуйся, страдальцев незримый посетителю.

Радуйся, преподобне отче наш Елеазаре.

Кондак 12

Благодать приял еси от Христа Бога, угодниче Христов Елеазаре, еже за ны, во обители твоей жительствующия, молитися. Темже ныне память

твою любезно почитающия благослови и удовли нас ко славословию Бога с песнию: Аллилуия.

Икос 12

Поюще твоя чудеса и пророческий дар твой благоговейно почитающе, все же богоугодное твое житие и многая исцеления, от раки твоея святыя болящим подаваемая, любовию воспоминающе, молим тя, угодниче Христов Елеазаре, твоего предстательства и нас грешных не отщети, но прияти от нас хваления сицевая:

Радуйся, благодатию Пресвятыя Троицы освященный;

радуйся, благодатию Пресвятыя Богородицы осененный.

Радуйся, в лице преподобных ублажаемый;
радуйся, к великим чудотворцем Соловецким сопричтенный.

Радуйся, со всеми святыми прославляемый;
радуйся, со ангелы Пресвятей Троице предстояй.

Радуйся, еще на земли Господа зрети сподобивыйся;

радуйся, ныне Того лицом к лицу созерцай.
Радуйся, преподобне отче наш Елеазаре.

Кондак 13

О преподобне и богоносне отче наш Елеазаре! Приими ныне приносимая тебе хваления наша и святыми твоими молитвами в жизни сей нас от всякаго злаго обстояния сохрани, в будущей же вечнаго осуждения избави, да сподобимся купно с тобою и со всеми святыми воспевати в Троице славимому Богу: Аллилуия.

Этот кондак читается трижды, затем икос 1 и кондак 1

Молитва

О преподобне отче наш Елеазаре, безмолвнаго иноческаго жития в пустыни Анзерстей богоизбранный начальниче и основателю! Молим тя мы, смиреннии и недостойнии, обстояще священный гроб твой во храме Пресвятыя Троицы, имже место сие освятися и, сущия ради в тебе благодати пророческия, прославися; испроси, угодниче Божий, у Вседержителя Бога, в Троице покланяемаго, Емуже в дерзновении с лики святых предстоиши, да дарует православному

народу нашему на враги победу и одоление, державе Российской мир и утверждение, церквам благостояние и всем людям тишину, и благоденствие, и изобилие плодов земных. Угаси молитвами твоими разжженные на ны стрелы диавольския, да не прикоснется нам злоба вражия, да благочестно скончавше временное житие, сподобимся наследовати Царствие Небесное и купно с тобою славити Отца и Сына и Святаго Духа во веки веков. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НУЖЕ
НЕБО**